

8

THE CHINESE-JAPANESE LIBRARY  
OF THE HARVARD-YENCHING INSTITUTE  
AT HARVARD UNIVERSITY

JAN 26 1954

T5417 / 4298 B

楊升菴集  
八

廿三十一



升菴先生文集三十一卷

成都楊慎著

從子

有仁編

後學趙開美校正  
高安陳邦瞻重校  
江陽王蕃臣  
內江蕭如松

今校

七言律詩

春日訪樊九岡幽居

九隴岡頭紫氣浮  
高人元是列仙儔  
黃花晚節開三  
徑翠竹清風臥一丘  
松菊微行常伴鶴  
苔磯獨釣不  
驚鷗伊余南北東西者  
浪跡深慙下榻留

春三月四日仰山余尹招遊疏江亭觀新修都

哈佛大學哈佛燕京  
圖書館藏



江堰

疏江亭上眺芳春千古離堆跡未陳  
轟轟樓臺籠蜃氣  
當當原隰接龍鱗  
并居需養非秦政  
則堰淘灘是禹神  
古圖經深海灘淺則堰今改則爲作非也  
爲喜灌壇河潤遠恩波德  
水又更新

周五津寄錦笺并柬楊雙泉

誰製鸞牋迥出羣  
雲英賦帛粲霜氛  
薛濤井上凝清露  
江令筵前擘綵雲  
窈窕翠藤盤側理  
連環香玉剪回文  
老來無復生花夢  
錦字泥緘付墨君

中元夕望開福寺燈塔

鈴語吟風寂梵音  
塔燈擎月淨高深  
孟蘭瑞草生三昧  
天竺曇花散五陰  
鴈沼恍疑星宿海  
鷺峰幻作火珠林  
西方謾說光明藏  
何似中華地布金

寄夏松泉

名邦謨

山中睡起三竿日  
天上書來五朶雲  
念我獨愁開閫寂  
感君長跪謝殷勤  
兩年故國交遊隔  
千里同心岐路分  
奇樹華滋看已徧  
不禁春色惱離羣

郟縣子雲閣

落景登臨縣郭西  
坐來結構與雲齊  
平郊遠訝行人小  
高閣迴看去鳥低  
林表餘花春寂寂  
城隅纖草晚



萋萋酒闌却下危梯去猶為風烟惜解携

立春日禁中對雪

天街晴雪照簾櫳萬戶千門似郢中先向曉營添朔  
氣却隨春伏轉條風上林花信梅邊出太液波聲柳  
外通郢客高歌誰屬和巴人下曲本難工

戊寅九日龍門登高

江山盤踞千年地風雨崔嵬百尺臺搖落霜林秋籟  
發參差雲堞曉光開四愁多阻張衡望九辨堪興宋  
玉哀望遠登高聊自遣芳萸艷菊漫相催

沐希甫葉道亨約會於太華寺雨中用杜少陵

韻一首

野竹幽花夾道迎紺園金刹望中明海天風色雲籠  
樹山國春寒雨滿城最覺龍鱗圖畫潤生憎鳥羽毳  
衣輕迷源復作留連任尋壑猶能窈窕行

冬夜宿羅漢寺

霜林金碧迷青紅木葉蕭蕭澄遠空長湖洲渚亂吞  
吐上方樓殿森玲瓏廊僧暝汲怯寒溜舟子夜語驚  
天風朝暎照檻堪一望羨爾冥冥高遶鴻

石岡沐公希甫輓詩

幾醉錦筵金叵羅忽騎天駟上天河霸陵猶記將軍



獵沛邑能忘猛士歌春寒澤畔經過少日暮山陽涕  
淚多露薤霜蒿悲自古蹊桃管枌奈君何

關索廟

關索危嶺在何處猿梯鳥道凌青霞千年廟貌猶生  
氣三國英雄此世家月捷西來武露布天威南向陣  
雲賒行客下馬一酌酒候旗風偃寒吹笳

高嶢村除夕

海濱戎旅久忘歸獨對朝嵐與夕霏莎徑晴沙采樵  
路柴門春水釣魚磯太平時節身難遇流轉風光賞  
莫違街鼓市塵渾隔斷村春隣火自相依

謝同鄉諸公寄川扇二首

鳳簾分封到海陬魚緘千里自巴丘綺寮白晝懸明  
月玳簾朱炎借早秋紈素底須誇罨畫蒲葵耐可污  
銀鈎仙家玉雪勞相贈詩苑瓊瑤愧未酬  
對青筠膜漬霞斑渥紫粳音影膏鍊月顏自覺金風爽  
仙馭誰將玉雪灑人寰薛濤歌裏揚清嘽卓女吟邊  
障遠山萬里橋西銷暑會幾回瓊樹夢中攀

卽席贈樊九岡黃梓谷

中涪西蜀兩高人良會通家及上春青歲掛冠甘隱  
逸早時揮塵靜風塵身閒正好啣杯數情洽何妨命



駕頻更與衡門添盛事聚星堂上繼荀陳

贈內

迢遞鄉關隔益州歸途雨沛更雲油重看周雅歌祁  
父又聽陽關唱杜秋明月迥臨天左界寒霄回夢浪  
西樓五紋絲履休勞寄好看生兒似阿侯

壽叙菴司馬弟

生辰正月十二日

西君初度早逢春千里相思隔錦津棣萼連枝情不  
盡筆花池草夢何頻廟廊閒却絲綸手山水能娛樂  
壽身繞膝斑衣當蔗境何須止酒負芳辰

送胡東渠少叅致仕歸晉陽

醪紱辭榮賦北征急流勇退見高情元龍湖海多豪  
氣長孺朝廷有直身

胡曾爲郡不  
屈節溫州相

塵世已破枕中夢

杯酒况兼身後名祗恐清風遺遠徼聊將公是托詩  
評

與諸弟別樂菴弟約有江陽之會

中宵風雨早來涼謝草春池別夢長綠野開筵聯玉  
樹紅亭離思結垂楊通波直下無千里明月何曾是  
兩鄉白晝看雲何限意佳期良晤在江陽

宋潛溪方遜志二賢祠亭陪東阜翁齊坐

青蘿太史赤城仙祠墓東西近接連江漢炳靈遷謫



地乾坤正氣革除年華池澹佇滄浪水栢寢寒通雪  
嶺烟不向一臺逢二妙何由投簡和新篇

合州舟中次韵王孔昭

名嘉賓

馳暉易逝髮難玄屈指驚心二十年北渚離愁芳草  
外東風歸信落花前煙開巴峽銅梁秀月照涪江石  
鏡圓栩栩瀛洲還舊夢嚶嚶喬木又新篇

雪後曾前溪憲副夜過

曾名鈞

閒門寂寂夜先扃窮巷俄傳暢轂經迢遞駒牙聲已  
到熒煌騎火夢初醒淮山桂樹懸鄉月漢節梅花照  
客星清興不辭淹雪棹濁醪還共醉雲亭

晏寢漫興

少年愛睡苦不足鷄鳴催入承明宮蹀躞金珂響斜  
月丁當玉佩搖迴風共憐人馬輝光異肯信簪裹拘  
攣同老便晏寢北窻北起看日生東海東

重寄張愈光

海客張公鬢已蒼豪遊曾結少年場古文金碧盤龍  
虎麤句瓊瑤琢鳳凰尋壑徑丘穿窈窕倚樓看鏡立  
滄芒朔風鴻鴈傳消息明月青山隔幾鄉

海裔江湄獨倚樓瑟居匏繫又驚秋菊花黃處回青  
眼楓葉紅時對白頭少日聲名追杜甫暮途鞅絆脫



莊周九龍尚有臨池興一鴈能忘遠札投

寄藍玉夫

名田

四海風紀藍御史廿載逃名卽墨城青冥鴻飛日月  
白紫淵龍臥波濤清晴窗香芸拂蟬蠹春谷喬木歌  
嬰鳴總角懽遊忽衰老握鏡愁看華髮生

登海寶寺望侍御唐池南

琦

別業因贈

橫紫煙光疑上方人家宛在水中央一重一掩肺腑  
地某水某丘遊釣鄉憶我頻年枉書札與君連日醉  
壺觴詩瓢不似山人瘦大雅堂高接盛唐

夏日抱病幽居

抱病閉門誰與同隱几焚香長夏中槐花細灑鷺黃  
雪芭蕉斜扇青鸞風蚊雷無賴鼓昏黑螢火多情流  
暝紅墨池過雨積新溜一部鳴蛙何大雄

泛蓮池晚歸

桂棹蘭舸泛碧漪芰媵蓮蕩倒芳卮十三鴈足傳情  
徧二八蛾眉度曲遲玉樹風前人散後金波水上月  
明時良辰勝會應難續風雨連霄惱別離

雨湖葉道亨泰招飲過湖晚歸

楊堤葉嶼迥相隣東主西賓意自親促席忽披千里  
霧歸舟重醉兩湖春沙邊漁火明還暗樹裏人家認



楊升菴文集 卷之三十一  
未真已訂魚鄉鷗社約片帆何惜往來頻

寄楊弘山都諫 士雲

螭頭早掛進賢冠跡遠東墀玉笋班倦意已還飛鳥  
外歸心元在急流間仙郎高議留青鎖學士新詩滿  
碧山十九峰前同醉處夢中瓊樹幾迴攀

唐僖宗行宮遺礎次熊尚弼侍御韵 名相

唐帝行宮有露臺礎蓮幾度換春苔軍容再向蠶叢  
狩王氣遙從駱谷來萬里山川神駿老五更風雨杜  
鵲哀始知蜀道蒙塵駕不及胡僧渡海盃 礎今在僧

丁丑九日

燕臺九日罷登臨節物蕭條八楚吟關塞驂騑迷去  
路朔風鴻鴈滯歸音仙遊御宿山川遠白露清霜日  
夜深雲際側身愁北望天涯懷抱可能禁

巳卯九日登高

采采黃花不滿衣暝煙起望自朝暉馬卿病裏芳菲  
晚宋玉愁邊節序非落木流波如有意來鴻去燕故  
相違消除強醉清樽酒歸掩田家白板扉

庚辰九日聞金鶴卿張惟信有彭門之會疾不  
克陪

一別黃金萬里臺孤城三見菊花開雲移北闕沾恩



楊子春文集 卷之三十一  
宴日遠南山獻壽杯抱病江天常闋寂關心時序獨  
徘徊高人喜共登高會咫尺彭門阻一陪

定州書事

此地去年新駐蹕行宮曾榜太平門堯樽置酒中衢  
溢梵宇揮毫古塔尊漢帝樓船窮島嶼周王車轍滿  
乾坤多方獨使勞神武諸將何由答主恩

中秋禁中對月

漢家臺殿號明光月滿秋高夜未央銀箭金壺催漏  
水仙音法曲獻霓裳路車天遠鸞聲靜宮扇風多雉  
影涼千里可憐同此夕美人迢遞隔西方

四月廿日侍班紀事次金鶴卿韻

金殿朱衣引陛前紫微清蹕從乾旋登庸已卜璿璣  
正顧命先從玉几傳雨露恩垂周壤徧星辰影動泰  
階連詞臣况有如椽筆好學王褒頌得賢

送熊維藩尹婺川

驪駒載道何駸駸飛鳧遙下蠻江潯鴻鴈不度牂牁  
國虎豹常啼楓樹林鳴琴仙室白日靜鎖印公堂朱  
夏深水蘖肯移清吏節卉裳須服遠人心

張崇象<sup>壁</sup>新居

碧山學士居茅屋錦里先生過草堂森森龍池接溝



水啾啾雀樹隱隣墻何人問字能携酒有子攤書解  
滿床巴曲肯來收下里楚歌還擬和滄浪

送高三峰

公韶

守大理

赤薦青驄近侍臣碧雞金馬問行頻南荒瘴厲禺山  
夜北渚烟花洱海春千里風謠采芳訊十年雲會阻  
光塵賜金已見先華省鳴玉終期上紫宸

次韵席仁同

春

遊昭應宮

佩聲齊下日華東朝退春遊有客同却轉河堤晴靄  
外迴瞻宮闕曉雲中曲江池泛仙源碧下苑花交御  
宿紅瓊玖木桃酬未得青門紫陌興何窮

尚書九峰孫公壽詩

百尺貞標澗底松四朝公望想儀容星辰衡岳當朱  
鳥雷雨湘江起臥龍白雪郢歌翻壽曲青雲奕葉繼  
僊蹤天瓢滿注供春雨三島遙應接九峰

送福上人還青城

青城三十六高峰寺在青峰第幾重飛錫曾聞經雪  
嶺結茅常愛住雲松花飄香界諸天雨金吼霜林半  
夜鍾傳語禪關休上鎖虎溪他日會相從

慶成宴次張惟信韵

太乙天壇望燎回九重春宴選辰開廣庭列坐瞻華



楊子春文集 卷之三十一  
袞合殿飄香入玉杯海宇謳歌千載遇雲門隊舞八  
荒來共憐彩筆飄搖賦獨有金門侍從才

送毛東鎮

給諫用成之子

憐君忠節之子孫公車待詔重高門江湖魏闕子牟  
遠暮田丙舍鐘繇存伏蒲內殿有膝跡請劍上方猶  
血痕鳳雛驥子定須繼懲美吹葢非爾倫

次韵劉潤之歲暮見懷

江曲橫煙遠樹低衡門榛草晚萋萋美人明月勞相  
憶遊子浮雲夢不迷桂水舟航天塹北松州車馬雪  
峰西愁來擬對公榮酒醉裏放歌嚴氏溪

次祝鳴和中秋對月韵

閣夜試看中夜月桂花正在散花樓仙客星輶下碧  
漢美人舊隱懷丹丘已聽笛奏亂歸思更對窻光驚  
醉眸一水盈盈隔千里佳期不共謝莊遊

高泉臨行再賦此以別

異鄉流落倚名公公去窮荒望益窮客路萬三千里  
外仙居七十二泉中昌黎仰斗台光遠靖節停雲時  
雨濛鍛羽涸鱗去安所翺飛川詠幾時同

七言排律

寄題楊凌泉水木清華堂



宛宛闌干石徑斜悠悠水木湛清華橋通玉局仙人  
館隣接金繩大士家翠鎖渭川千畝月紅蒸杜曲一  
園花劉安招隱歌叢桂屈子離騷賦折麻嵐靄望山  
堪在笏陌塵流水任行車問兒好掃青苔壁欲把新  
詩落墨鴉

觀三塔寺龍女花

天女來看龍樹花空香隨步惹瓶沙烟花點綴慈雲  
薄韶景留連慧日斜鬢髻曉霑三昧雨羅綿夜妬六  
銖霞偷啣野鹿羞塵世共命巢禽隔海涯水泛暗通  
金母島風飄曾到玉皇家誰教博望來西域不並蒲

桃上漢槎

高嶢積雨始晴遲簡西巒

長湖射雨萬鏃雄屋角掛龍池飲虹亭亭玉筋繞山  
閣森森銀竹圍屏風織女下機絲羃野綃人入市珠  
跳空畫圖未盡輞川妙詞賦詎信陽臺工停雲已拖  
楚練白倒景忽放燕脂紅綠蟻幸自盈鑿落黃鷄不  
用歌玲瓏

長江萬里圖

五才坎德迫靈長萬里岷山始濫觴流漢天迴經灩  
澦盤渦谷轉下柴桑楊瀾左蠡曾潭府大壑歸虛廣



楊子都文集 卷之三十一  
莫鄉天遣陽侯分淼淼帝咨神禹畫茫茫岑青翠觀  
鮫人館水碧金膏龍伯堂景浴陽鳥朝旭早燄然陰  
火夜霞光烟寒星散三洲樹風致雲飛百尺檣鶴子  
鳧雛喧澍雨紋螺錦蚌映翔陽籠筒津鼓驚浮客欸  
乃漁歌屬赧郎泗罄石鐘鏘島嶼輕漣頻彩媚滄浪  
投鞭堪笑苻堅策靜練難賡謝眺章彩鷁退飛休借  
問白鷗浩蕩信徜徉

明 新安 吳勉學校梓

升菴先生文集三十一卷

升菴先生文集三十二卷

從子 有仁編輯

成都楊慎著

後學趙開美校正  
高安陳邦瞻重校  
江陽王藩臣  
內江蕭如松 全校

五言絕句

青橋夜宿

驛亭臨白水石榻滿蒼苔遠客渾無夢江聲枕上來

宿華亭寺

二一首

花樹高於屋紅霞夜照人聲聲枝上鳥也似惜餘春  
天風與海水鳴籟隔山間半夜衣裳濕清朝樹樹雲



雨夕避漏起坐 二首

滯雨蒼山夜停燈伴獨愁  
詰朝明鏡裏華髮颯先秋

其二

雲房遷雨榻枕席籍盆甕  
似向東林宿蓮花滴漏聲

積雨始晴

霽曉憑高處涼風吹我襟  
海天堪倚杵嶺樹小如簪

三塔秋日

始見椒花綠又驚椒實紅  
客心正鬱鬱作底對秋風

陽橋彎

澗壑浮白雲俯瞰低於馬  
雲開見青松又在澗壑千

西路雜述 五首

沙遠名乾海坡高號望城  
海曾無滴水城亦是虛名

其二

路學盤蛇上人緣磨蟻旋  
深於小有洞陰過大漫天

其三

濯足倒流水回頭相見坡  
馬嘶人又倦落景在烟蘿

其四

虎穴猶能入猿梯亦可臨  
把關苗子面開店主人心

其五

哨名一碗水坡號半邊山  
疲人倚石磴渴馬飲冰湍



卽事一絕

蘋末清風起涼生近水樓盈盈樓上女齊唱楚江秋  
四月五日夜與叙菴未菴樂菴得菴話別集句  
鼎鼎百年內一別一回老欲知萬里情坐對青燈曉

西蘭圖 四首

蘭爲君子佩植根不當間幽谷發遠馥九畹詠王孫

又

蘭爲美人採蘋藻掩芳潔沐浴助精禋豈爲薺澤設

又

蘭爲仙姬名升雲女兒山玄景入天上名字留人間

又

蘭爲王者香鬱鬯薦清廟猗猗有遺音併入瑤琴調

嘉州登舟

馬上風塵倦登舟似到家雨晴涼意足含笑對江花

渝江登陸

來往舟如屋相隨一月期登途不忍去翻似別家時

又

曠野惟看樹高城不見人新梅臨水發照影爲誰春

馬枋橋

無奈旅懷多村酤引睡魔醒醒不成寐楓葉助哦哦



青檣驛早發

遠客貪晨發三更夢已回江聲如驟雨吹到枕邊來

白石羨

童子報仙翁白石羨初熟坐客不須嘗歸家穿破腹  
普魯基曉發

霜華重于雪星光明似月喔喔荒鷄鳴蕭蕭征馬發  
自安寧之高嶢李葵之走馬相迎

遙岑昨夜別獨樹今朝迎高嶢連楊處清話到三更  
夜行安慶

風順月仍明扁舟半夜行鷄鳴問前路已近九江城

宿鯉魚山

投暝宿前灣占風夜未闌月沉鴻鴈渚雲起鯉魚山

夕上江陵

熒熒沙市燈統統黃潭鼓悠悠隱後帆遙遙認前渚

其二

水落沙渚寬鴈聲驚早寒舟子夜不寐北風吹雀竿

射亭

飛雨花前疾鳴骹風外聞當場誰破敵王粲始從軍

螳川獨泛

柳市村村接松燈點點明家家傾蟻酒夜夜鱸魚羨



其二

月遊渾似晝水泛不知寒星留驚魚躍雙枝起鶴盤

月夕獨酌

夜沽東橋酒醉聽焚童歌羈人不作樂其如鄉思何

春二首

海風吹海樹十日閉門中坐惜繁華過墻頭數落紅

其二

行樂三春好春來轉劇愁鄉心悲遠望莫上最高樓

陪盛德章春泛

中洲歌采芳曲渚艤歸艖風起春江晚飛花點石梁

鐵鸚武歌

蜀中名駕鸚雲南號鐵鸚武卽伯勞也

可憐鐵鸚武常鳴五更前愁人抱暝臥聲聲到耳邊

寶珠寺

遙望瀑布泉徙倚雙杉樹繫馬幾度遊徘徊不能去

觀音寺

雙樹依山曲青蓮有廢臺遊人不肯入却似剡溪回

雲房寺

海盡燒空艷山篔拂座涼胡僧書跡在指點古雲房

清淨寺

淨域無塵雜風花落漸多空門元不閉屐齒未曾過



寶印寺

曲徑餘榛路穹碑則蘚痕空廊僧不住鄰媪為開門

寶曇寺

千仞崇山頂清泉何處分涓涓石澗底一派下青雲

圓照寺

橫枕山窓裏月明林影動禪心炯不眠寧有巴山夢

筇竹寺

博望南行路昆池杳若天自憐遷播客一住已三年

黃龍龕

看碑籍草茵倚杖忽移辰絕域驚文藻飄零愧古人

寺有楊仲弘碑文

正覺寺

隱隱村圍寺亭亭竹繞門還期長夏日坐嘯辟疆園

海源寺

海眼葳蕤樹峰頭壓百尋靈釣遊未遠不見石為林

龍華寺

空宇三禪寂荒林七聖迷閑來丘壑興那復問東西

妙高寺

絕頂愁飛鳥丹霞隱林抄孤僧早閉門熒熒佛燈小

普吉菴



松箐一何深細路縈百折行人歇松陰羸馬食松葉

春日過山家

山床壓春酒滴作澗泉聲與君終日醉松風吹復醒

雨後見月

雨氣歛青霽月華揚彩暈戲魚蓮葉北驚鵲樹枝南

題竹

帝子瀟湘渚乘鸞嫋嫋邊可憐江上竹猶帶古時烟

存歿絕句

何遜重泉別范雲清淚多他年淮隱處腸斷八公歌

右何仲默

草句傳燕國風流有薛君千年濠上意寂寂向誰云

右薛君采

東京崔子玉臥病隔清漳天上青藜燭何人白玉堂

右崔子鍾

張公滄海客大雅起溟雲未許乘槎去蛟龍射斗文

右張愈光

碧雲停日暮華月照芳池夢回歌玉樹病渴憶瓊枝

右余懋昭

近有錢塘信斯人亦可傷更憐新特在猶喚舊江郎

右江景孚



一悵遼東鶴千年竟不歸夢魂迴永夜相見是邪非  
右劉汝楫

一疾緣醫誤孤蹤任世慵淚痕添沫水名字見峨眉峰  
右安公石

飲祁氏園

今日花前飲祁園是習池小翁不若芋爭奈葛強兒

荅段德夫水部

四首

自笑嵇康懶雲林絕舊交寧知千里翮肯問一枝巢  
天涯戎旅春一十五回新多情花與鳥歲歲有留人  
幽蘭深谷底感此歲芳徂欲問丹砂訣吾非勾漏徒

漢上題襟句梁朝水部才錦書何處至羅戶爲君開

代贈

二首

懶膽杯分綫猩唇脂印紅雙歌連理曲並醉合歡叢  
南壩迎郎來西壩送郎去回身掩空閨月明天未曙

明 新安 吳勉學校梓

升菴先生文集三十二卷



升菴先生文集三十三卷

成都楊慎著

從子 有仁編輯

後學趙開美校正  
高安陳邦瞻重校  
江陽王藩臣  
內江蕭如松 全校

五言絕句 六句附

虛湖曲四胤為劉少鄰賦

滇湖湛空碧光景涵太虛主人湖上家結舫水中居  
湖疊通九淵湖鏡涵萬象陰火宵有無波塵時下上  
留連非魚鳥溯洄豈蒹葭明月浴灑露青雲汲流霞  
搖筆泳漣漪蟠宵生沆漚因之滄浪吟湖亭記余邁



出郊

高田如樓梯平田如棋局白鷺忽飛來點破秧針綠

招董西羽

朝向城中來夕向城中去獨夜一微吟攀留桂之樹

寄承冰壺

紫翠隱丹房仙人在上方欲往疑無路白雲封點蒼

搗衣杵

山東女子趙小錢年十五為賊所掠罵賊不從以搗衣杵擊賊遇害事聞詔旌其門

戕賊金鈿鋤擊賊搗衣杵今見趙小錢昔聞楊愍女

普賢寺

香閣影波心叢雲萬木深月明清梵夜遙應海潮音

進耳寺

蠻村蔽古刹窳堵粉如雲寺圯殘僧少鳴螺寂不聞

悟空菴

一龕如燕凹中有貂璫塚石麟臥青蕪烟交春茸茸

太平寺

忍草迷香徑空餘屋數間香鑪烟不起苔蝕鷓鴣班

松隱菴

松菴饒古松露鬣交雲尾蘿徑少人行日暮嘯山鬼

金馬寺



東林金馬寺南亭金馬關往來皆馬客試問誰者賢  
白龍寺

詩人張禹山喜用白龍字何事獨無詩留題白龍寺

羅漢寺

覺路花非染靈山草亦香虛空卽此境何處覓空王

太華寺

古地新蘭若標峰貫彩霞碧波臨萬頃指點見星槎

妙湛寺

廢刹臨官渡香臺夜景澄僧言龍火焰却是打漁燈

積翠巖

翠巖隱玄龕苔徑無鳥跡不見煮茶烟那知有禪客

恩波池別劉潤之

酌酒臨池水回舡拂芰荷匆匆馬上去留興與烟波

毛東鎮過高峽同宿作人名詩

釣石崇遙岸樵林旅遠山東園公肯過桃李照衰顏

漣漪包明月今夕茲無還

月儀帖

鸞驚開二妙蠶尾見征西花蠹暉銷鼈香蟬跋認鷺

不逢華蓋叟誰與重熈熈

梁元帝古跡啓鸞驚之奇聞之於索靖鷹峙之巧又顯之于蔡邕山谷詩惜無征西蠶尾手爲寫黃門急就章征西指索靖也華蓋山人宋仲温模爲拓



本也月儀帖秘閣續刻尾有鷺字  
東坡詩我今久閣筆不寫紙尾鷺

玉臺體 四首

流盼轉相憐含羞不肯前  
綠珠吹笛夜碧玉破瓜年  
滅燭難藏影洞房明月懸

調絲曲房下援鏡綺窓西  
粧罷金星出歌殘璧月低  
留歡夜未足恨殺汝南雞

戚里盛豪華聯翩赴狹斜  
寶闌圍鬪鴨金瓦擲鳴蛙  
歸騎春城晚風吹滿路花

菱歌歇晚涼桂楫隱回塘  
珠佩雙臯冷羅裙十里香  
錦書隨綺翼持報邵陵王

七星關漁者

石澗無通水漁舟反上山  
得魚隨馬賣抱獺趁鴉還  
問爾江湖興茫茫若夢間

枕上

君莫笑萍梗來往上滇雲  
我本聖之徒七十而從軍  
沱若竟何益濁酒且酣欣

臥佛

金仙疲津梁雲臥恣天行  
菩薩歎退位未盡區中情  
二諦憑誰解松風與水聲

紺甲麗人



銀甲卸彈箏花從玉指生  
逡巡捲羅袖掩抑捧金觥  
莫摘相思子瓊枝最有情

秋情遊海源寺

林壑散烟霏鐘鼓喧清曉  
日氣抱巒陰虹橋上雲杪  
離鴻海島來疑是三青鳥

楚江曲

巫山花已紅楚水波新綠  
兩兩浣沙人照影鬪粧束  
笑問竹枝詞何如采蓮曲

雨霽龍門泛舟泝流回作

江干新雨晴江纜新流上  
舡頭轉雲峰舡尾疊花浪

中洲蹇誰留渺渺臨風望

太史蕭宗樂半閒園八詠

蕭名與成

詔許歸蓬華性本愛丘山  
臨水知魚樂披林共鳥閒  
勞勞車蓋影渺渺隔重關

右靜觀堂

高人厭世氛亭子枕孤雲  
宇定天光發風清地籟聞

此君相對處幽意許平分

中虛亭

瑤草岩姿麗金沙海色新  
射于翹鳳羽薜荔長龍鱗  
謝氏芝蘭砌還聯玉樹春

交翠庭

早歲辭芸閣歸來臥蕙楊  
已寤邯鄲夢猶註逍遙篇  
郊扉未可閉洪崖時拍肩

忙中間處



后皇嘉樹底香影覆秋盤  
樵子逢王質幽人對謝安  
興來歌楚頌策杖暮盤桓

橘樂山

太乙遙分種紅雲仙島香  
爽氣金莖上恩波銀漢傍  
田田新咏好留刻戲魚堂

蓮地

三脊羞封禪靈瓊續楚辭  
綠樽藉芳草彩筆賦山茨  
千載青霞意應同孔稚圭

茅閣

宮錦換漁蓑浮家倚芰荷  
月邀三太白水漾百東坡  
擊汰歸恒晚鮫人識棹歌

浮軒

自滇歸高嶢留別胡在軒

名廷祿

乘風歸吾廬臨水飲君酒  
顛倒白接瓠攀折青楊柳

相望片帆程相憶能來否

避暑林亭

几席近漣漪枕簟依林樾  
琴聲歇流水扇影却明月  
涼襟何遙道炎敲坐超忽

升菴先生文集三十三卷



升菴先生文集三十四卷

從子有仁編輯

成都楊慎著

後學趙開美校正  
高安陳邦瞻重校

江陽王藩臣  
內江蕭如松全校

七言絕句

王子淵祠

瑋曄靈芝發秀翹  
子淵擣藻揆天朝  
漢皇不賞賢臣  
頌只教宮人詠洞蕭

徐及泉相送至斜堰河

二首

滇隅流落鬢成絲  
為憶家林惱夢思  
沃野喜看平似



楊子春文集卷之二十四  
掌春郊載酒正花時

又

長流溝水引都江斷岸危橋窄石砭並馬不知村路  
遠更穿斜堰渡驚瀧

菜子花

菜子花如黃金色想見蘭膏春盎碧貧女梳頭水當  
油那和襟解聞薌澤

秋夕稍涼坐蕊珠樓卽景

涼牖方開一幅天踈星點綴冷金箋噫鳴鴈過橫斜  
字寫出秋聲賦一篇

水仙花四絕

凌波微步洛川傍合與江梅競晚芳不見當年林處  
士西湖配食水仙王

又

金盞銀臺映綠樽清香况復賽蘭蓀祗應岩桂爲朋  
輩未許山礬作弟昆

又

瑤池阿母惜幽芳青鳥東來未許將小玉雙成都睡  
去一枝傳自段安香

又



乘鯉琴高採掇新蔚藍天上少紅塵黃姑渚畔湔裙  
水不是人間妬婦津

百日紅

李徑桃蹊與杏叢春來二十四番風朝開暮落渾堪  
惜何似雕闌百日紅

喜浮橋成

臘尾江頭綻早梅浮梁銀漢亘昭回不須桂楫迎桃  
葉步步金蓮夜夜來

月夕見美人過浮橋

鴈齒螭頭影動搖金波玉鏡夜迢迢忽逢羅鞵輕盈

步疑是鮫人出賣綃

丁巳五月五大熱追涼江山平遠樓

二首

平遠江山四望開颯然風至似蘭臺披襟便覺涼如  
洗一任城頭暝色催

又

颯然風至似蘭臺此地那容執客來姑射風姿冰雪  
妬班姬團扇漫多才

丁巳元宵韓炅菴送燈

多病新春減醉狂元宵作劇懶逢場華燈珍重勞相  
贈繡佛前頭禮定光



滇海曲 十二首

梁王閣榭水中央  
烏鵲雙星帶五潢  
跨海虹橋三十里  
廣寒宮殿夜飄香

又

碧鷄金馬古梁州  
銅柱鍊橋天際頭  
試問平滇功第一  
逢人惟說潁川侯

又

化城樓閣壯人寰  
澤國封疆鎮兩關  
雲氣開成銀色界  
天工斲出點蒼山

又

葉榆巨浸環三島  
益部雄都控百蠻  
神禹導河雙洱水  
武侯征路七星關

又

沙金海貝出西荒  
桃竹橦華貢上方  
香象渡河來佛子  
白狼槃木拜夷王

又

碣房草閣瞰夷庭  
側島懸崖控絕陁  
雞足已窮章亥步  
鷺頭空入梵王經

又

孤戍平沙望大荒  
邊愁海思入滄茫  
帝鄉東北仙雲



楊子春文集卷之三十四  
四  
隔夔道西南媚景長

又

昆明池水三百里汀花海藻十洲連使者乘槎曾不  
到空勞武帝御樓船

又

湖蕩魚蝦晨積場市橋燈火夜交光油窓洞戶吳商  
肆羅帕封頤夔婦妝

又

蘋香波暖泛雲津漁樵歌曲水濱天氣常如二三  
月花枝不斷四時春

又

煮海醜郎暝漉沙避風估客夜乘槎雪浮杭稻壓春  
酒霞嚼檳榔呼早茶

又

海濱龍市趁春畬江曲魚村弄晚霞孔雀行穿鸚鵡  
樹錦鶯飛啄杜鵑花

白崖

雲開遠見彩雲州一片煙嵐鳥外浮還見前年山下  
路密蒙花發艷新秋

素馨花



金碧佳人墮馬妝鷓鴣林裏鬪芬芳穿花貫縷盤香  
雪曾把風流惱陸郎

陸賈南中行迎云南中遊女以采絲貫素馨為飾事載南方草

木狀貫花繞髻今猶然

### 光尊寺別張愈光

萬里炎荒萬里身銷魂何事別離頻光尊寺裏桃應  
笑回首東風九度春

### 夢中作宮詞

丙申秋七月二十四日

長信宮中夜未央斑姬團扇畫秦王三更雲屋西風  
起翠檠紅羅滿玉霜

### 粉團花

靚飾豐容膩玉肌輕風渥露錦屏幃釵頭懶戴應嫌  
重留取餘香染夜衣

### 桐梓驛元夕

戴石孤峰古驛門青羌吹角報黃昏三家村裏無燈  
火千樹梅花作上元

### 胡蝶戲真珠花

漆園仙夢到綃宮栩栩輕烟裊裊風九曲金針穿不  
得瑤華光碎月明中

### 山茶花

綠葉紅英鬪雪開黃蜂粉蝶不曾來海邊珠樹無顏



楊升菴文集卷之二十四  
色羞把瓊枝照玉臺

泛滇海歸感舊口占

談笑已無錢卧月風流不見李華仙  
漁村酒市經遊處斜日寒林鎖暮烟

寄漢州太守劉仲粟

名琮吾師南峰侍郎諱文煥之子

南峰桃李徧峨岷白髮門生今幾人  
東閣郎君今健否何時同醉鴈橋春

雨中漫興柬泓山中溪洱臯

四首

風裊芭蕉羽扇斜雲峰苔壁對簷牙  
滿城連日黃梅雨開遍金釵石斛花

又

簾紋如水帳如烟涼氣先秋到枕邊  
蚊脚蠅頭跡如掃右軍羸得靜佳眠

又

青山繞屋水周堂枕底潺湲夢裏涼  
階下濯纓憐孺子吾廬應卽是滄浪

又

雨聲蕭寺喜留賓窓竹簷花更可人  
莫道相如徒四壁壺中猶有錦江春

夏夕



楊升菴文集卷之二十四  
湘水魚鱗冷簟文博山蟲篆罷龍薰開窓對影延新月坐愛金波洗火雲

戊申高嶢中秋風雨

人家一片海心浮彷彿樓臺似十洲不用梯雲取明月水晶宮裏度中秋

題漁娃圖

碧玉聲沉管井邊綠珠魂斷舞樓前風流畢竟輸漁父醉擁漁娃盡日眠

竹枝詞 九首

夔州府城白帝西家家樓閣層層梯冬雪下來不到

地春水生時與樹齊

日照峰頭紫霧開雪消江面綠波來魚腹浦邊晒網去麝香山上打柴回

江頭秋色換春風江上楓林青又紅下水上風來往貫一年長在馬船中

最高峰頂有人家冬種蔓菁春采茶長笑江頭來往客冷風寒雨宿天涯

青江白石女郎神門外往來祈賽頻風颭青旗香雨歇山江花開瑤草春

紅粧女伴碧江濱蓮艸花簪茜草裙西舍東隣同夜



燭吹笙打鼓賽朝雲

神女峰前江水深襄王此地幾沉吟擘花温玉朝朝

態翠壁丹楓夜夜心

上峽舟航風浪多送郎行去為郎歌白鹽紅錦多多

載危石高灘穩穩過

無義灘頭風浪收黃雲開處見黃牛白波一道青峰

裏聽盡猿聲是峽州

方云與劉禹錫異時同工

升菴先生文集三十四卷

升菴先生文集三十五卷

從子有仁編輯

成都楊慎著

後學趙開美校正  
高安陳邦瞻重校  
江陽王藩臣  
內江蕭如松全校

七言絕句

狼山凱歌 十首

狼山原上陣如雲孟瀆河邊早策助水弩解清川后

浪天戈能駐魯陽曛

舊統邊軍赤水犀新封京觀是鯨鯢文昌奏入中黃

霽武庫兵收太白低



按轡收兵楓樹林絕流飛渡早傳音風前鷁退吳山  
靜月下龍吟江水深

關山新月照鳴茄河朔清霜淬劔花塞上征夫猶萬  
里北京歸路敢言賒

玄草清霜飽紫駟雕戈畫戟擁清油歸來始識從軍  
樂痛定翻思在賊愁

嫋姚身健驪驪肥立近天家日月旂忽報內庭傳聖  
旨掛紅分隊出黃扉

鷺鼓聲中曉日噉貔貅初散鳳皇門才從魏闕瞻中  
辰便入容臺飲上尊

去時官柳萬枝黃歸路寒葭滿地霜挾纈已温良月  
候吹綸更作小春芳

三軍喜氣失嚴冬萬里中原罷戰鋒甲帳籌功星兩  
兩午門傳捷日彤彤

無定河邊望旆旃居延城外候烽烟家家喜語占烏  
鵲不用金釵當卜錢

方豪云此為詞苑一時擅場  
惟何仲默十二首可與並傳

峽中

峽裏青山夢裏過曉來春比夜來多開蓬試看江頭  
路樹樹殘梅照綠波

望中條



征馬長鳴向北風  
峭關回首暮天東  
太行過盡中條出  
一路青山白雪中

春郊卽事 二首

楊柳垂垂曲水濱  
驪車日日送征塵  
春來莫怪枝條少  
無限臨岐折贈人

果園坊裏杏花开  
公子邀歡載酒來  
醉落殘英千萬片  
馬頭更折一枝回

白蓮 三首

凌波仙子白霓裳  
風助精神露洗粧  
曾向藥珠宮裏見  
人間何處有紅芳

玉立亭亭笑粉光  
浣紗人在越溪傍  
鱗宮貝屋難  
住合上吳王白玉牀

風清月皎露華涼  
深隱花叢暗遞香  
寄語玉人休折盡  
夜深留伴睡鴛鴦

二月廿二日飲段憲卿金樞樓

金樞樓上醉流霞  
何羨扶風豪士家  
丹砂唱罷初生月  
燭剪銀臺第幾花

三月十八日水濱閒步 二首

魚羹蟻酒野人歡  
且喜春殘花未殘  
無事栖栖經半載  
出門天地一何寬



楊林今日是昭關白首拘留未得還漁父浣紗渾不見斷腸今古淚潺湲

黃花吟

金風灑灑開黃菊黃蝶茸茸競相逐千英萬蕊艷且香晚來知向何枝宿

董壩

扁舟孤棹宿楓林獵火漁燈逼歲陰千里思家回白首青山江上疊愁心

詠史

月仗雲門五彩毬御前爭睹最先籌須臾贏得西川

印便脫青衣擁碧油

魚鳧關

魚鳧今日是陽關九度長征九度還何補干城與心腹枉教霜雪老容顏

摩尼寒夜擁爐有懷馮定水

行爐特贈遠行人處處溫柔鄉裏身寒夕賴君生暖熱炭星紅噴雪樓春

雪關絕粒諭從者

僕痛馬病漫興嗟戎旅華封本一家我骨已仙元不餒何須食柏與食霞



冰雪封途馬蹄踏之鏗然有聲

積雪層冰路百盤銀杯逐馬玉鳴鑾老狂不怕玄冬  
冷呵手揮毫興未闌

贈賈東晦庚寅歲作附此

蘭叟和光臥白雲賈生東晦挹清芬何人爲續稽康  
傳題作楊林兩隱君

于役江鄉歸經板橋丁亥

千里長征不憚遙解鞍明日問歸橈真如謝眺宣城  
路南浦新林過板橋

三題板橋館壁

朔雪玄冬凍不開僕夫疲病馬虺隤鬚毛盡向風塵  
白往復滇雲十四迴

丘鴻夫蘇時霖楊元達聯席同宿廣心樓枕上

口占

六齒瓊頭飲百甌水樓寒榻話綢繆只須棋局銷長  
夜何用埋憂與寄愁

高嶢雨中悶坐以果實散諸村童因憶兒輩

不爲全生狎楚童自緣嬉戲感衰翁昨宵夢裏分明  
見讓棗推梨在眼中

華亭寺僧德林送山茶花



寶地香風吹雨花林公分送子雲家玄亭丈室同岑  
寂相望白牛山月斜

春帖用宋人四句例 三首

離別江陽初餞臘淹留滇徼又逢春敬恭四海皆兄  
弟文字三都盡主賓

江國梅花頭併白高嶢楊柳眼還青八村烟水移春  
檻九寺雲山借景亭

豐年雪霽行天馬 戊午歲 上日春還帖戶鷄 元旦酉 天運

盈虛與消息吾生南北又東西

梅會齋惠金暈酒盃

藥王繞甕巧製新紅銷金釵換陶巾不須綵繡殷勤  
捧花露仙醺別有春

贈門生楊靜夫北上

滇海門生廿載遙飛騰次第上雲霄衰年七十猶羈  
旅誰向玄亭慰寂寥

謝平江送至廣通

明月清風渡兩橋相隨百里不辭遙共憐話別無長  
夜紅燭清樽碧玉簫

寄遠曲

濯錦江頭烟水綠相思萬里人如玉瑤琴別後不曾



揚子集卷之三十五  
彈今朝才理將歸曲

毛園萃芳亭與沈中白丘月渚同賦

四首

繚垣洞屋鎖烟霞五色離披百種花客子看來猶駐  
馬主人何事不歸家

哨聲紅雀語黃鶯知我名園賞襍英遠客應添今夕  
夢海棠紅濕錦官城

雒城一別會滇雲花底匆匆酒未醺青殿揮毫應憶  
我金梁明月碧曉分

酥雨才收又夕陽參差竹粉映花光流泉石竇停教  
住莫放輕飄曲水香

詠箐底香花

滇海花名箐底香山礬風味水仙粧瓊枝本是天邊  
種零落遐荒四拾霜

暮春淇館會別以道

淇水東流生晚波巴人惜別動燕歌可憐裊裊垂楊  
柳奈此迢迢別恨何

四月二日雨中撥悶

零雨崇朝不下樓開窓烟外見漁舟今年四月寒猶  
在坐擁紅爐送酒籌

紀夢



夢裏江陽荔子單覺來枕上五更寒  
含情懶對痴人說強向杯中覓舊歡

病渴汲樓前井花水飲之

半夜兒童汲井花老夫病渴漱雲牙  
八公德水何須問甘露清冷在我家

十二月廿三日高峽大雪

四首

朔雪如筵密不開自憐身在亂雲堆  
剡溪縱有王猷棹中道那堪與盡回

佳句漁簑憐鄭谷中庭鶴竚立王恭  
那知執戟楊雲老凍臥孤村積雪中

雪滿昆池勝畫圖長吟獨坐興偏孤  
何如太白襄陽道笑坐金鞍掛一壺

雪中送炭憶前人欲暖曲身成直身  
翠柏蒼松元自勁歲寒那肯變天真

犯星歌

四首

金沙江水繞環洲江岸家家對白鷗  
漁父長歌夔人曲鹽商愛上白夷樓

餘甘結子草交頭暮靄朝嵐似蜃樓  
飛鳥不飛愁羽墮行人何事遠來遊

搶壘弓營徧翠微韋韞椎髻裂華衣  
松林霰合騰蛇



出草屋星流暗蠱飛  
十月妖花紅滿烟萬家蠻樹綠遮天眼中忽見渾相  
識夢裏曾遊瘴海邊

興教寺海棠

雨樹繁花占上春多情誰是惜芳人京華一朵千金  
價肯信空山委路塵

有寄

寶刀截水恨難裁玉筍啼春濕未開昨夜陽臺添暮  
雨夢魂飛過曲江來

升菴先生文集三十五卷

升菴先生文集三十六卷

從子有仁編輯

成都楊慎著

後學趙開美校正  
高安陳邦瞻重校  
江陽王藩臣  
內江蕭如松 全校

七言絕句

溫泉再過懷李仁甫

仙源靈液蓬壺境碧杜紅蘅慵照影美人來時寒谷  
春美人去後溫泉冷

閏七夕

閏月新秋重七日金風玉露夜如何似憐天上佳期



少特遣仙姬再渡河  
星回節

忽見庭花析刺桐故園珍樹幾然紅  
年年六月星回節長在天涯客路中

野鷄坪

野鷄坪邊饒雜花幽蘭石竹交山茶可憐春色浩無  
主徒使騷人惱鬢華

贈箏人 二首

綺筵雕俎換新聲博取瓊花出玉英肯信博陵崔十  
四平生願作樂中箏

玄的檀痕畫未成翔鸞屏裏鬪輕輕盈羅虬若向今宵  
見不比紅兒比玉英

中秋

四壁蛩吟白露團西園清夜為誰歡千家門閉中秋  
月只有愁人獨自看

江陵舟中贈田李二鄉客

朗月寒沙夜未分玉簫金管醉中聞明朝回首沅江  
路愁聽清猿和白雲

宮詞

天上佳人出北方能騎白馬射黃羊玉顏長在金輦



側笑指青山是妾鄉

鳥弔山

在浪穹縣鳳集之所

鳥弔山頭鳥道微  
梧葉隕黃青  
復稀九苞文彩誰得  
見千古畫圖知是非

早春

江暖波光日映光  
幾家同住水雲鄉  
槿籬茅屋繁花裏  
也有秋千出短墻

嘉州壁津

壁津漁火照江城  
城下灘聲徹夜鳴  
寒笛莫吹楊柳曲  
故園回首不勝情

馬道壁上次韻

嘉陵江水碧迢迢  
雷吼晴灘雪湧潮  
岸曲行人愁駐馬  
清猿聲在白雲霄

八月十六日遊水頭

三首

易陽門外眺金天  
禾黍故宮秋可憐  
泛泛龍渠通野井  
茫茫雉堞入蒼烟

馬跑泉水水西頭  
當日帝丘成古丘  
遙見雙林青靄合  
尚思千騎翠華遊

放棹山陰未擬回  
酒酣乘興更登臺  
蒼藤古木渾無語  
曾見繁華幾主來



食蓮子憶師邵

錦盃曾醉碧池春  
回首風光入夢新  
今日臨池剝蓮子  
却思池上詠花人

以來禽果餉喫菴

佳果東來濯錦江  
楚謠萍實亦堪雙  
王家珍重來禽帖  
青李櫻桃總受降

喫菴餉白果

霜黃鴨脚折琅玕  
結實纍纍綴蠟丸  
好比仙家雙桂樹  
一枝留向月中攀

春望 三首

東風先到海東頭  
春興催人獨上樓  
最是晚來凝望處  
曲堤煙柳似皇州  
滇海風多不起沙  
汀洲新綠遍天涯  
采芳亦有江南意  
十里春波遠泛花

古岸新花金碧叢  
昆池三百水烟通  
梁王閣道青蕪國  
漁父帆檣白鳥風

寄葉道亨

欲截珊瑚作釣槎  
旋隨鷗鳥狎雲沙  
美人不隔他鄉月  
遷客何妨着處家

書扇



楊柳詞 卷之三十一  
墨池波染叢山雲書盡蒲葵與練裙郎君自愛家雞  
好肯問蘭亭王右軍

楊柳枝詞 二首

漢東門外柳新栽拂曉長堤露眼開野老攀條相向  
語去年曾被賊燒來

臨水臨風漾碧漪含煙含霧一枝枝戰塵收後無離  
別又見長條到地時

張嵩山云此紀彭幸菴平藍鄔  
二賊事也可謂詩史可謂善頌

聖燈寺

蒼烟叢裏聖燈紅火齊螢輝照遠空元是楓林霜葉  
下露華光汝月明中

汎舟昆江

杜若洲邊露氣香更無人語有鳴榔澄潭倒影天涵  
水翻覺星辰在下方

賦得劉郎浦送人

吳蜀成婚此水傍至今江浦號劉郎停橈送客休嘲  
咏不是朝雲惑楚王

聞笛

江樓寒笛起春聲蜀客扁舟萬里行吹盡落梅還折  
柳新春殘臘正關情

渡黃河 二首



河上人家杏子花河邊人唱浪陶沙草薰風暖春將  
半若个行人不憶家

廣武城邊河水黃沿河百里盡沙岡麥苗短短榆錢  
小愁聽居人說歲荒

三閣詞 二首

桃根桃葉鬪春葩水調河傳穆護砂無限江南新樂  
府君王獨賞後庭花

夜籤聲斷燦朝霞翡翠三千擁麗華舞罷前溪明月  
下白門楊柳起藏鴉

自江川之澱江贈王鈍菴廷表并柬董西泉雲

漢三首

通海江川湖水清與君連日鏡中行孤山一點衝烟  
小何羨霞標掛赤城

澱江色似碧醞醑萬頃煙波際綠蕪只少樓臺相掩  
映天然圖畫勝西湖

海螯江鱗四時供水蓼山花月月紅自是人生不行  
樂尊鱸何必羨江東

沐五華送雞縱

海上天風吹玉芝樵童睡熟不曾知仙翁住近華陽  
洞分得瓊英一兩枝



楊升菴文集 卷之三十一  
貴竹雜咏 五首

林雲菁霰不分天  
清露常如雨  
綠穿百里迥無烟火  
接依稀猶似燧人前

其二

綺繒纏髻作雕題  
鐵距穿鞋學馬蹄  
清曉樵斤探虎  
穴黃昏汲甕下猿梯

其三

銅鼓聲中夜賽神  
敲釵擊釧闢金銀  
馬郎起舞娖徒  
唱惱殺長征久戍人

其四

保甸坡前不可留  
盤江渡頭惟一舟  
驅鼃役鵲無  
術誰是尋源博望侯

其五

龍馬先朝出養龍  
御前賜名飛越峰  
人間神駿寧無  
種天上孫陽不易逢

八月十三日夜夢亡室安人驚泣而寤因思去  
年丁丑是日在京師安人未明興告予曰今日  
趨朝不可如常日之宴蓋其日警蹕值新狩還  
也今遇是日感其賢淑又小子週二歲之晬重  
感賦絕句二首



五更殘夢正迷離  
窓紙光明燭焰遲  
却憶去年當此日  
催人晨起早朝時  
稚子今朝是兩週  
新衣戲舞拜前頭  
傷心孺慕聲聲切  
母在重泉聽得不

龍關歌 三首

鷲頭峰古接仙氛  
龍尾泉香石溜分  
爨婦洗酥凝白雪  
樵童叫笛響青雲

清海橋下海波涼  
月白霜清木葉黃  
驚鷁聯翩穿遠樹  
沉魚撥刺避鳴榔

雙洱烟波似五津  
漁燈點點水粼粼  
月中對影遙傳

酒樹裏聞歌不見人

梅花絕句 九首有序

余也枕疾彌旬  
殘臘將盡使人探梅  
咸云未開怪而詰之  
詭以春遲出戶偶見  
樵女簪髻

自笑曰村姑亦風韻  
乎戲作數詩

探梅人似放魚人  
只道梅稍粉未勻  
不向村姑釵上見  
那知虛負一年春

村姑只恐是花神  
花信前頭報早春  
奇樹芳滋休冷眼  
好從初地喚真真

庾嶺峒亭隴驛遙  
梅開忽近歲之朝  
折來燭下爐前



玩只恐瓊枝煖易消

開自多情落亦香殘英點綴曲堤傍織成白地光明

錦合與無功作醉鄉

閉戶先生何太痴梅花開徧不吟詩歲寒三友交情

澹却似無懷上古時

么鳳叢邊鶴膝枝孤山清夢水仙祠覺來寒影誰能

寫苦憶逃禪老補之

夜來偷醉早梅傍風致何人繼陸郎禁酒國中佳節

換樽前誰喚點酥娘

索笑尋簷花不應被花惱徹為花憎舞筵東望開金

盞渴殺西川杜少陵

放歌曾作昔年遊千樹梅花滇海頭寶髻斜簪光照

座一船絲竹載梁州

七言六句

六月廿日永昌病臥

巳未歲

涼風却暑換秋清滇國星回舊有名已把跳虫秉炎

火又驅白鳥靜雷聲老夫病眼渾無睡四壁鼯吟勝

打更

浩然閣舟泛同李仁夫作

莽蒼野色杳無津湖翠波光欲蕩人空籟迥聞王子



吹非烟遙起洛妃塵明朝君上仙槎去也憶狂夫夢  
海濱

升菴先生文集三十六卷

升菴先生文集三十七卷

成都楊慎著

從子 有仁編輯

後學趙開美校正  
高安陳邦瞻重校  
江陽王藩臣  
內江蕭如松 全校

長短句

流螢篇

癸巳之夏臥病三塔寺地多榛莽螢飛緯夕  
感東山之詩及唐人之賦率爾操觚為流螢

篇

沉沉鴈沼鬱棲連隱隱龍宮熠燿然濛晴零雨東山



下颺轉薰風南陸邊可憐合暈暉玄夜可惜分華族  
絳天絳天玄夜景微茫水簾銀牀漏未央誰家院落  
非天燭何處園林不夜光夜光灑露下天燭涼氛瀉  
陰火遙穿翡翠簾流星近度鴛鴦瓦此時蟋蟀罷宵  
征此際蠋蟬停沸聲長門團扇斑姬闈阿房卷衣秦  
后屏蘇婦下機妝不理卓女當壚酒半醒爲見流螢  
思遠道爲感流年惜芳艸暝看雙星炯不眠曉望長  
河白如掃蕩子從軍向月支閨人對影滯秋期蠶書  
宛轉連環字鴈帛殷勤織錦詩願得逢君拾光彩不  
教賤妾歛愁眉

夏水謠臨安作

階簷下雨載帽龍女嫁天公笑日反燒水淹竈巖洞  
青鼃上樹叫

梅花引

櫟括簡文梅花賦

層城靈苑上林中芳菲奇樹幾多叢華滋一一寒圭  
變彩艷紛紛朔籟空年歸淑氣新瑤芸動瑄塵共憐  
梅花早迎陽已逗春吐華四照林含英九衢路玉綴  
明冰懸珠離零電布漂雪影遙沉隨風香遠度靡靡  
挂遊絲霏霏雜驚霧樓上爭落粉機中妬紈素二八  
三五年蘭心蕙質爛采芳驚稚節抱恨惜餘寒相服



華桂薄文衣繡屈單顧影下瑤祀纖手弄嬌姿雙開  
翠琅牖四捲絳羅帷春風吹梅畏落盡賤妾坐此歛  
蛾眉琴聲吟弄梅花落鏡裏容華恐失時

伯勞吟

長短句

南中有鳥名伯勞禽經羽族稱雄豪曾隸九苞來揀

竹

俗呼伯勞為鳳皇皂隸

恥隨百舌繞蓬蒿青春受謝四月維

夏茂樹薰風長林短夜伊伊啾啾未有聲架架格格

先雞鳴

荆楚歲時記架架格格

塔前停蚓笛江上住鼉更熠

耀收燈火蟋蟀罷纂箏村婦侵星提甕汲山農帶月

架犁耕戴勝降桑人共羨鷓鴣歇芳君不見寄信難

憑北去鴻單栖肯逐西飛燕故鄉迢迢水雲深客遊

聞此幾驚心何時高枕松窓下細聽桐花小鳳吟

過駐節橋讀東阜劉遠夫公碑文愴然有感

溪尾水沄沄峰頭正夕曛含悽經駐節洒淚讀遺文

橋南花如浣花好橋北油油生碧草草色逐年新花

開又一春可憐東阜客今作北却塵憶昨錦江離別

處江邊手折垂楊樹千里還鄉不見君斷腸隣笛山

陽賦

明月引

明月三五前看看玉兔圓明月二八後漸漸銀蟾瘦



楊子春文集卷之三十一  
天上嬋娟有盈缺人間寧免生離別綠醅翠醕一樽  
同紅顏白首千山隔

陽關圖引

行行重行行送客安西征可憐渭城曲已作陽關聲  
陽關去渭城四千五百里纔聞征馬嘶初見行塵起  
行塵征馬短亭前弱柳垂楊古道邊已憐柳葉青如  
線更愛楊花白似綿柳葉楊花春正好輜車且駐長  
安道玉壺清酒競芬芳金谷艷歌殊窈窕徘徊共勸  
少畱連泯默相看兩傾倒別鶴離鸞曲易終百鶴飛  
燕互西東搖搖翠幃城隅日獵獵紅旗野渡風斷歌

零舞情難寫分手回頭淚盈把安閒堪羨采薪人瀟  
灑誰如釣漁者天涯風物異方身爭似在家相對貧  
鄉夢三更懸馬首迴腸九折繞車輪銷磨歲月緣名  
利鴻飛不至人偏至我所思兮明月同君之出矣浮  
雲異龍眠古刻昏莓苔蕭郎彩筆生綃開銷魂莫續  
江淹賦好畫陶潛歸去來

之去長安當是  
四千五百里也

松谷歌

爲陳太史賦

桂山漫招隱桃源何渺茫何如徂徠松明堂克棟梁  
君材本是明堂質昂霄聳壑寥天一九臯瑞露饒聲



聞三徑歲寒借膠漆顧我輕塵弱草同神交萬里尺  
書通何時九頂南岷下共聽陶家一枕風

黃栢行

行成稿

寧食苦黃栢莫作貴州客寧食頭七醋莫行貴州路  
少年輕壯心遠遊早歲從軍今白頭只今行年七十  
二猶作羈纍滇海陬

東西南北引

七十行成稿

北騎與南舟山川非壯遊東迎又西送日月老賓從  
弧矢生而爲男子東西南北四方事余何爲者將無  
同水中漂梗風中蓬中夜起坐萬感集啜其泣矣何

嗟及

烏撒寒

三四五六七言

烏撒天玄雲簇雪爲林冰爲谷脫火龍髯縮金烏足  
鳶跼溪毒淫羊腸坂詰屈四載難以乘橈五枝詎能  
緣木獨行叢叢况瘁人向曉欲投何處宿

結交行贈張李文兼寄劉建之

澗有流泉山有塵結交易交心難親古人所以歎白  
首恒如新彈冠當途少知己何況貧交多苦辛慎也  
早克觀國賓金馬蘭臺獻納臣亨衢豈但履虎尾逢  
時吐氣嬰龍鱗一朝遠謫濱萬死曠野匪兇誰與隣



楊子齋文集卷之三十一  
五  
舊遊相棄不相識平生懷抱空向人行路之難有如  
此感慨令人思洗耳新知者誰張與劉一見豁然忘  
旅憂晤言數晨夕歡娛歷春秋竹林不厭清狂客漆  
園共擬逍遙遊馬鳴龍樹訪野寺鸞吟鳳咲登高丘  
山中日月自瀟洒眼前世事空悠悠窮途握手心尚  
爾雲天高義誰能儔劉子昨別臯橋頭君今復動西  
南騶故鄉遙憶不可見故人同心復異縣枯魚涸轍  
懷沫濡窮鳥空林垂羽翰黯然銷魂望去塵徒有臨  
岐淚如霰君上青雲翼日車我看明月隔天涯行欲  
尋仙三島去相思青鳥遞瑤華

惡氛行

金碧山前惡氛起虜馬來飲滇海水城西放火銀漢  
紅炎焰塵頭高十里兩重日暈圍白虹萬家仰首呼  
蒼穹相顧慘然無顏色嗚呼寄命須史中賊徒渾幾  
箇枕戈臨水臥我軍屯北門分明不敢過土酋脅盟  
來索官城上無言騎堞看父老倉忙雙涕泗細說去  
冬尋甸事絃急柱促柄倒持首禍今朝竟何自堂堂  
之陣誰主兵喁喁公等皆儒生賊來不肯令出哨賊  
去但解擡空營豈無雄武士奮身思一決咫尺轅門  
不肯前怒髮衝冠氣填咽况聞千金逐日費連月公



儲已傾竭土兵抄掠盡村園升天無梯地無穴熙皞  
閭闔踰百年太平官府真神仙紫薇迢迢華蓋遠虛  
將敲朴威窮邊邊隅一旦紛解瓦喑鳴變作擎拳者  
喑鳴擎拳兩奈何君不見建武年中任校尉又不見  
開元年中張乾陀

送余學官歸羅江

豆子山打瓦鼓陽坪關撒白雨白雨下娶龍女織得  
絹二丈五一半屬羅江一半屬玄武我誦綿州歌思  
鄉心獨苦送君歸羅江浦

踉蹌操

二四六八十言

踉蹌操升菴子之所作也升菴子流戍滇陰  
朱克明左性之二子惠然肯來濯我同波如  
逃虛者踉位其空聞人足音蹌然喜矣况而  
嬰其鳴矧而榮之見久矣夫子之據梧而弗  
音也感詩人徵蒙莊反昭文焉使繼之作踉  
蹌操

更長夜良明月養魄華燈熺光戍客違家萬里美人  
來天一方誦謫仙惜餘春之賦歌屈子悲回風之章  
將予逃禪兮如是觀之域與子中聖乎無何有之鄉

薛稷齊兵憲望鶴樓吟



君不見貞觀薛少保下筆好寫青田鳥又不見開元  
薛郎中兼泛滄浪學釣翁名家羽儀有如此後來傑  
出復難比明心炯炯在雲端仙標昂昂如畫裏黃鵠  
磯邊鸚武洲高人別起望鶴樓渺渺烟霞連北極悠  
悠天地入東流驚浪頽波須砥柱未許緱山招隱去  
楓葉寧栖楚客林桃花不問秦人樹赤霄玄圃記升  
沉今也鳴臯昔在陰坎止流行隨所寓山林鍾鼎亦  
何心一覽鶴樓卷重賦鶴樓吟嗚呼少保郎中雙南  
金世無杜甫誰知音

鄒生行贈謙之編修謫官廣德

慧星夜掃文昌宮天下學士悲途窮鄒生上書叫閭  
闔九關虎豹誰爲通雷公怒號玉女笑囚笄鸞鳳隨  
沙虫蠖伸龍屈應物理曲釣直弦羞謠童君不見賈  
生昔遇漢文帝一疏反覆雙流涕忠臣自古憂聖明  
近侍何曾忘獻替石渠天祿君少年文彩照耀金華  
筵從祀擬奮獲麟筆豐稱思陳雉雉篇以茲瓠落甘  
流放金馬長鳴下仙仗北極逍遙紫氣傍南陵彷彿  
丹丘上涼風蕭蕭吹五兩登蘋聊騁平原望遷客心  
隨江水流遊子夢繞浮雲嶂清商吟激楚唱酒闌擊  
節氣悲壯月寒江清劔光盪水有蛟螭陸犀象感慨



贈君隨君向君向江湖脫網羅我淹京邑阻烟波乘  
風焉得騎鴻鵠萬里相隨一羽過

明新安吳勉學校梓

升菴先生文集三十七卷

升菴先生文集三十八卷

從子有仁編輯

成都楊慎著

後學趙開美校正  
高安陳邦瞻重校  
江陽王藩臣  
內江蕭如松全校

長短句

賦得絕纓歌送客之楚遊

代人作

楚王宴客章華臺活花起舞夜春來螭膏鳳腦光如  
晝蛾眉蟬鬢空徘徊絕纓美人信淑貞牽衣上客何  
悲蹙君王愛士輕嬋娟盡絕冠纓始張燭張燭開筵  
復盡歡青楓鴉啼白露寒明日褰旗方城野還是夜



楊升菴文集卷之三十八  
來牽衣者君不見戰國諸豪雄以色結死士齊有孟  
嘗君燕有丹太子君行弔古過楚宮美人何在臺殿  
空醉看落花如錦地裙腰綠草眠東風

明湖篇贈羅野庭

玉鏡明湖春水綠君乘星輅向滇蜀接憶清風豁瘴  
煙搖筆高吟振空谷碧雞金馬我嘗遊寫韻遙岑海  
上樓披雲不得隨雙屐此日相逢談九丘珠玉照人  
慚我老薜蘿開樽卽傾倒岫嶺遙瞻翠靄顛峨嵋近  
指青霞杪紫河車金光草便欲相携訪蓬島百年良  
會苦蹉跎江上題襟別思多石扇洞門恒不鎖期君

乘興一來過

交河令行贈袁子變

袁侯出宰古交河銅章墨綬雜雕戈黃雲高闕芳菲  
少紫塞長城氛祲多桑榆蔭入嫖姚幕絃誦音諧勅  
勒歌公主琵琶玉連瑣將軍騶裏金盤陀袁侯雕龍  
且韜豹白羽指揮坐中翻阮瑀軍書王粲詩魯連飛  
箭劉琨嘯始信扶顛籌策良赫赫威稜動北荒虎鈴  
帳外關山月燕寢香中鼓角霜君不見隆州虞允文  
海鯨船破百萬軍又不見巴渝甘興霸江表虎臣雄  
吳下古來文武道本同樽俎笑談能拆衝六鈞弓與



一丁字調言悠悠非至公  
九重側席思儒將丙夜庚牌下天上莫嗟騏驥困鹽  
車會見漢庭徵魏尚

孝津行

岷山青蟠空下映犍爲江江濱有孝娥自名叔先雄  
娥父爲功曹冉冉趨府中泛舟越洪濤捐軀以凶終  
娥也痛父死臨淵矢相從練囊封兒臂珠環係兒躬  
寄言與兄別別去不再逢寧假黿鼉梁直下蛟龍宮  
川后垂玄鑒江妃憐丹衷抱父尸出依泊葶花叢  
戚黨悲復感閭里唁且閩風誼動今古廟貌森穹崇

文紀與令伯祠墓相西東解使犍爲縣永作忠孝邦  
岷之山石可泐犍之江波可竭千秋菊兮萬春蘭孝  
娥之名焉可滅

三岔驛

三岔驛十字路北去南來幾朝暮朝見揚揚擁蓋來  
暮看寂寂回車去今古銷沉名利中短亭流水長亭  
樹

草池歌贈余懋賢

謝氏池塘句風流百千春何人繼理美之子稱瑛珍  
蠶叢古域青衣水炳靈毓秀王楊里

此王楊王當楊棟也君家



潭潭枕江湄分源一一俱鍾美天馬出閑無暫蹶芳  
桂秀林總駢蒞司馬高名在朔邊蟬嫣奕世更材賢  
清遊阮氏竹林下盛世韋家花樹前伯季文武聲猷  
大仲也東山恣雲卧大雅先跡媿三陳競爽何曾弱  
一箇鶴池渺雲霄芳池華羽遙仙源誰縮千里地觀  
予重賡春草謠三玄亭上停鸞鑣五華煙霞迥見招  
碧泉仙舟影泛泛蒼山秀句氣飄飄天涯瑣旅知音  
少眼中之人吾獨老欲問江中湛湛波却憐河畔青  
青草吾生摧頽思一丘君今當途仍黑頭功名在子  
豈殊我坡翁有語君知否開樽飲我酒歌詩爲我壽  
馬大荒白首沾餘光

送樊九岡副使歸新繁

名景麟

君詩已抗三謝行鄉衮不必追王楊願君勛名繼司  
馬大荒白首沾餘光  
別君於南雲碧鷄之澤追君於東城金馬之坡酌君  
以連菹清麴之酒侑君以竹枝巴渝之歌天涯岐路  
鎮長在故人零落渾無多憶昔君爲漢陽守滄浪之  
清古無有拂衣掉頭不肯顧飲水舊謠在人口明詔  
復起句町行官突未黔先濯纓宦遊不博歸故里榮  
祿何如全令名九隴高岡白雲野吾廬世耕在其下  
清冷好結鷗鷺盟春秋願醉雞豚社蜃雨蠻烟老玉



楊升菴文集卷三十一  
關小山叢桂不同攀愁心如月何時掇夜夜隨君夢  
裏還

舟中閱唐詩紀事王起李紳張籍令狐楚於白  
樂天席上各賦一字至七字詩以題爲韻遂效  
其體爲花風月雪四首宋人名一七令

花摘錦鋪霞邀蝶隊聚蜂衙珠瓔姹女寶髻宮娃風  
前香掩丹月底影交加綠水名園幾簇青樓大道千  
家謝傅金屏成坐笑陳朝瓊樹不須誇

風偃草飄蓬過竹院拂蘭蕪柳提搖綠花徑飛紅青  
缸殘燄滅碧幌嫩涼通漆園篇中竽籟蘭臺賦裡雌

雄無影迥隨仙客御有情還與故人同

月霜凝冰潔三五圓二八缺玉作乾坤銀爲宮闕如  
鏡復如鉤似環仍似玦蘭閨少婦添愁榆塞征人怨  
別漢家今夕影娥池穆穆金波歌未闕

雪凝明澄徹飛玉塵布瓊屑蒼雲暮同巖風曉別深  
山樵徑封遠水漁舟絕南枝忽報梅開北戶俄驚竹  
折萬樹有花春不紅九天無月夜長白

朝暎行

荒雞嗥朝暎攬衣國西門辭家從軍已四載欲歸未  
歸仍苦奔王孫曾遭蓮勺困宣父亦被伐木屯古人



楊子菴文集卷三十八  
賢聖且如此今我嵬瑣何足論行行將何適四郊盡  
荆棘欲留不可留欲行行不得歲月無情日崔嵬頭  
童齒豁心已灰中遠撫劔腸欲結短歌激烈長歌哀  
長歌哀淚盈把匪兇匪虎在曠野結愛同心難盡言  
况是悠悠行路者

送雷時若還蜀兼寄劉叅之

離離劔上斗落落琴中星丈夫不得意且持歸紫局  
秦川迢迢幾千里燕臺八月涼風起閑居已懷宋玉  
悲况是登山復臨水下馬津亭落日黃飛鴉不盡翔  
雲長旅店夜眠聞葉下山城早發見新霜到家正是

初寒月酒熟橙黃肥紫鱖高堂稱壽有餘閒還肆高  
情訪林樾問訊江湖劉改之別來憶我有新詩明年  
早遂聯鑣約要及春城桃李期

李文正母麻太夫人壽九十詩

三章

星沙炳靈仙李有故柯星沙炳靈仙李有故柯風霜  
不摧雨露何多度索山中蟠桃同花歌以言之仙李  
有故柯

昔聞仙家麻姑多歲年昔聞仙家麻姑多歲年結璘  
不處鬱儀屢遷平陸成波滄海爲田歌以言之麻姑  
多歲年



淳風復返上壽真可期淳風復返上壽真可期戲彩  
含飴緯筵獻卮琅琅仙音僮僮月儀歌以言之上壽  
真可期

夜郎曲 三首

夜郎城桐梓原東堞壘平村民如野鹿猶說翰林名

城在桐梓驛  
東十餘里

夜郎溪槃木陰中半景西漁舟投樹宿水鳥逗花啼

溪名趕水在東  
溪在平古城下

夜郎歌漢宮曾取教秦娥竹枝傳窈窕楊柳轉猗儻

夜郎歌卽巴歌  
也今名思南歌

壽林圖

玉堂天上何陰森玉樹堦前接壽林壽林草木紛滿  
地中有椿萱獨靈異青崖丹壑晴霓高仙都真境分  
秋毫壺天空濶海色古茫茫翠木環波濤呼龍耕煙  
鳥爲耨瑤草瓊枝幾昏曉不信婆娑急景凋貪看縹  
緲齊煙小玄洲遊戲八千秋木公金母共忘憂翠琅  
干紫芝草九霞觴三青鳥誰將滄海圖移向長安道  
蓬瀛仙客金閨英錦衣玉珮趨承明仙瓢灑灑泛雲  
浪賓筵炯炯映長庚鼓以洞越瑟和以參差笙三嘆  
清廟之遺響再補白華之遺聲椿樹無陰萱不歇堯



莫再數新年月

博南謠

瀾滄自失姜兵備白日公然劫行李博南行商叢怨  
歌黃金失手淚滂沱鐵索菁邊山峩峩金沙江頭足  
風波為客從來辛苦多嗟我行商奈若何

燕麥謠

馬牙冰滿林白損我苦蕎傷燕麥甲子陰鳥無食山  
頭農甸心客晞晞荒眼雙流血臘馬躓春牛吼癩象  
來窮軍走括金使者空城守

老鴉林謠

老鴉林水塘舖夷寇劫商斷行路人不行蔓草荒官  
道變為蛇虺場今日再逢太平日冷場來往由康莊  
何年始昔年巳酉今壬子竹詔金柝聲相聞九哨連  
連轟雲起老鴉革其音水塘復清泚商歌旅舞一千  
里云誰之思郝御史

佛現

鳥名峨眉山有之聲呼  
類佛現每斗必有金光

佛現佛現鳥語易隨人意變山川發晶熒草木呈葱  
蓊坐使遊人心目亂佛現佛現

後河激歌 二首

携女娟兮遊清池臨徬徨兮步委蛇翠管兮東靡丹



蓉兮西披俄風髮兮霧鬢忽雨帶兮雲衣帽余胆兮  
延佇望君馬兮來遲

翡翠爲竿兮虹蜺爲絲拾海月兮采江離媿魚媵兮  
惜龍妃蘆中兮怡倡空悲前有樽酒兮羞以滇芝君  
不醉兮曷歸

競渡浪系三言

天中屆午節戾雨不雨霽不霽扇涼颼消暑氣江之  
永水無際橋橫霓樹如薺玉窪菖錦林荔競龍舟蕩  
犀柁殷雷鼓浮雲吹汨齊出澆澣揭靄迺倡于薦繼  
幟爭奪纛相掣楚曼姬巴媿妓影照釵沫濺袂山凝

紫日映未鱗霞穿蟾鈎綴樂無荒倦而憇榜鱗艘汎  
容裔矍鑠翁尚見戲倣琦玕斥浪系

山行卽事

五 桐子花開映村塢單衣初試貧兒舞春寒已過四十

詠梅

元僧高峰有此詩而不佳特賦一首

九言

昨夜小春十月微陽回綠萼梅葢早傍南枝開折贈  
未寄陸凱隴頭去相思忽到盧仝窓下來歌殘水調  
沉珠明月浦舞破山香碎玉凌風臺錯恨高樓三弄  
叫雲笛無奈二十四番花信催



揚升菴文集卷之三十八  
新安吳勉學 校梓

升菴先生文集三十八卷

升菴先生文集三十九卷

成都楊慎著

從子 有仁編輯

後學趙開美校正  
高安陳邦瞻重校  
江陽王藩臣  
內江蕭如松 全校

長短句附雜體

望西山

望西山 迢遞慶霄間  
峰輝林彩如堪挹  
翠壁丹梯若可攀  
亦有青鳥占紫氣  
還乘白鶴駐紅顏  
斗極南陲分王氣  
天驕北漠控胡關  
近接橋陵鼎湖路  
太乙勾陳臨玉樹  
遙瞻雙闕對氤氳  
葱葱鬱鬱捧瑞雲



潤接天河起箕尾根纏維絡鎮坤文長安樓閣中天  
起峻極相連近天咫金芙蓉開萬井中罨画屏張三  
素裏龍宮鯨吼曉嵐青鳳城鴉宿烟光紫雪晴瓊岳  
轉分明日映名都一何綺雪晴日映風光和陌上遊  
人積漸多相邀帝女柔桑路其奈王孫芳草何靜婉  
香車寒翟第嫋姚飛蓋擁盤陀楊柳千條金作線梨  
花百葉玉爲柯雕俎華筵分內苑錦塲繡野入平坡  
行行國艷皆桃李處處塵香盡綺羅巨靈鼉鼉應相  
避玄囿蕭條未許過別有青蓮千萬宇金榜紅牆圍  
淨土錫卓多非漢代名暈飛各占周原膺橫玉行香

盡貴人揮金資福皆豪賈菩提花發六時閒吉祥風  
動千鈴語海曇仙梵日供張鉢衣寶鬘時歌舞望山  
竟如何由來逸興多朝回長挂笏休沐想鳴珂三月  
春將謝未請遊山假痼疾在烟霞俗鞅縈晨夜閑人  
真遂愛山情韋曲天西少送迎短屐踏莎占土脉奚  
囊探韵賦春晴豈似神仙限官府愛山空作望山行

觀打魚

石梁水落天波澄漁人放獺如放鷹編筠作航來往  
便往似飛梭來似箭蛟潭無極龍客幽江空獺飢漁  
人愁漁人愁河魴喜清江一曲孤煙起



太華山歌送陳子學

陳名講

五星墮地爲五嶽金虎西南動芒角踐華爲城類削  
成云是巨靈之手斲三條鼎立當中央直與鴻濛奠  
清濁太一終南培塿開洪河清渭繞行杯日華先照  
蓮花上雲氣常從仙掌來高穿箭括通天路俯瞰明  
星玉女臺冷然風馭不可駐降望大壑令心哀繡衣  
柱史巖廊才入關玉節凌崔嵬搖山撼嶽下闐闐青  
冥白日驅風雷奔軼絕塵亘萬里駟馬蹠蹠無虺隤  
君家老仙舊隱處丹爐石榻荒蒼苔登臨不問烟霞  
侶但借神池一勺洗盡區中埃千仞峰端秋隼健題

書好寄西風回

河橋篇寄用貞懋昭

渾河流水桑乾潮何年代石架長橋玄鼉窟近填烏  
鵲滄海波平上赤霄尋源知近遠浩浩鴻流滿平連  
太液池迴接昆明苑帝里神臯紫氣中天江折木銀  
潢通澗漚卜洛應相並灞滄朝宗詎可同星傳雲槎  
下城闕電逝飈馳交冀越橋外車音響若雷橋畔闌  
干明似月玉溪云模寫殆盡可憐楊柳裊晴煙才見藏鴉又  
噪蟬東西溝水分岐路南北烟霜感歲年玉溪云有感慨沉  
璜使者辭芳甸聯璧才人遙出餞別浦清沙漾縠紋



回淑秋濤收組練飛蓋臨風緩去旌青門落日彩霞  
生懸知濯錦江邊夢轉見盧溝河上情

玉溪云全篇氣  
格絕似初唐

### 江上聞箏曲

清江明月懸光彩映漪漣燈影近臨水箏聲遙出船  
明月華燈兩相照箏語絃聲何要妙輕璘縠彩艷陽  
歌掩抑摧藏苦寒調不見新粧出鏡臺想應纖手拂  
香埃若非汝南劉碧玉定是秦中薛夜來二八蛾眉  
競丰蔭十三鴈足傳情徧溫侯帳底氣若虹謝傅筵  
前淚如霰舊寵新期容易垂高張疏節起難諧金杯

漫自傳芳酒羅袖空勞掛玉釵曲終如鼓湘靈瑟斷  
腸似和胡笳拍凌雲未遇挾天才幽吟一夜東方白

### 和章水部沙坪茶歌

有跋

玉壘之關寶唐山丹危翠險不可攀上有沙坪寸金  
地瑞艸之魁生其間芳芽春茁金鴉嘴紫笋待抽錦  
豹斑相如凡將名最的譜之重見毛文錫洛下盧仝  
未得嘗吳中陸羽何曾覓逸味盛誇張景陽白兔樓  
前錦里傍貯之玉盃薔薇水擬以帝臺甘露漿聚龍  
雲分麝月蘇蘭薪桂清芬發參隅迢遞渺天涯玉食  
何由獻金闕君作茶歌如作史不獨品茶兼品士西



南側陋阻明揚官府神仙多蔽美君不聞夜光明月  
投人按劍嗔又不聞擁腫蟠木先容爲上珍  
往年任館閣陸子淵謂予曰沙坪茶信絕品矣  
何以無稱于古余曰毛文錫茶譜云玉壘關寶  
唐山有茶樹懸崖而生筍長三寸五寸始得一  
葉兩葉晉張景陽成都白兔樓詩云芳茶冠六  
清逸味播九區此非沙坪茶之始乎

青城紀遊贈劉珥江

愛山人少說山多名山之約恒蹉跎羨君曾次有丘  
壑借余步履尋松蘿晨發浣花道夕憇郫筒阿子雲

閣上蠹簡散杜宇城頭烏尾訛鴻蒙岩崿臨天谷崕  
阜蝶嶮瞰驚波離堆仞佛蟠鼻鼻都堰蜿蜒壓蛟鼉  
翩如楚磯駕黃鶴駛如蜀棧騎青螺昌黎扶掖赤藤  
杖謝公屐齒青苔窠王喬雙鳥能濟勝鄭虔簷花同  
經過伏龍仙觀模斷碣疏江新亭聽俚歌下瀨干笈  
風外鷁遙岑一點煙中螺漏天夜雨丹枕警朝雲解  
駁紅鏡磨玉壺携春恣談笑銀鞍徬險仍婆娑明月  
津亭又分袂睽景復命江陽舸聊書短韵邀君和青  
城回首青嵯峨浮生聚散飛鴻似四者難并將奈何

太華寺別張季文



華頂雲真海月携手三度遊同心兩迴別携手同心  
此地分他鄉客路復離羣明年載酒花林下啼鳥春  
山誰共聞

刺桐花行

刺桐花惟嶺南及滇中有之異物志曰刺桐  
卽蒼梧嶺南多此物因以名郡滇中名鸚哥  
花花形酷似之開以夏秋之交酒邊率爾命

篇云

刺桐花蒼梧樹瀟洒迎涼辰菴藹留炎暮渥翠掃蠻  
烟飛英飄瘴霧蠻煙瘴霧雨餘天耀彩舒芳最可憐

紅欺鸚喙淺砂點鶴頭鮮連林千炬爛照水百枝然  
星回節後流螢院乞巧樓前烏鵲筵邊候兩年通象  
譯方隅萬里接龍編故鄉殊未返空園聊息偃一夕  
復一朝行看歲華晚環波海碣渺渺流千雲金碧層  
層獻汀際遙瞻柳渾洲隴坻長望張衡坂鈎陳閣道  
紫微垣鳴鑾曳佩列文軒建章東回下鵠沼甘泉西  
對宿麟園金芝曄曄商飈起玉植青葱瑞露繁翡翠  
叢中遊蛺蝶鷺黃葉底集鷓鴣枝近上林全許借樹  
高温室竟無言詎信長年悲落木誰憐遷客賦登蘋  
歸去來定何日秋菊英英桂將實憇遠廬宴蓬華濁



酒田家醉不辭清纓漁父愁先失

雪關謠

雪關謠述途人思何將軍也將軍名卿成都

人

雪山關雪風起十二月斷行旅霧爲箐水爲臺馬毛  
縮鳥鳴哀將軍不重來西路何時開

伏枕行贈嚴應階

嚴名時泰

慎也投荒今五年竭來卧病左足偏臨床伏枕與子  
別心斷神傷魂黯然憶昔去國行戍邊弔影纍纍入  
瘴烟永昌試問在何處都門相違萬三千虎豹晝橫

林箐側魑魅夕度關山煎肝腸欲絕隴頭水夢寐忽  
到夜郎天肉黃皮皺形半脫喜一見子日周旋除館  
西河客樂土傾壺北道賓初筵悲歌慷慨悲壯士風  
流儒雅追先賢解鞍青華洞褰裳碧玉泉抽子瓊敷  
藻枉我瑤華篇衰遲遠尋畱藥價寂寞時共買山錢  
同年意氣同兄弟異鄉會合情尤異貧交豈歎雲雨  
翻急難實在風波地昂昂嚴夫子矯矯人中龍長才  
抱經濟大雅含春容叩之清廟絙朱瑟懸之東序鏗  
金鏞我今甘心憔悴窮山中子亦胡爲淹留簿書叢  
朱輪五馬人生貴青翰雙魚海若宮七澤霜風鳴五



兩白蘋丹楓渺予望分手遙指大江西愁心已掛匡  
廬上嚴夫子交誼非凡流往時傾蓋今白頭子行高  
步隘九州我病崔嵬思一丘水蛭草駟那忍棄雲鵬  
籬鷓難相求待子功成採藥去期子共結逍遙遊

畫草蟲爲黃月坡賦

黃名祺

天下幾人畫草蟲吳興公子癡孫隆水縑雪練鳴趯  
趯丹屏繡几飛薨薨漁父蜻蜓愛釣縷美人蟋蟀嫌  
鷓籠百種生意何融融夷羊非羊鴻非鴻長卿帶晚  
翠簡子矜秋紅王孫西遊歸未得清江碧草烟濛濛  
憶昔曹不興點蠅惑顛翁滕王掃蛟蝶摹榻喧唐宮

宋家道君入能品鸞標竈軸沉毡穹古來好手竟寂  
寞老癡江東灑絕跡君不見醯鷄發覆天夢夢蝶飛  
磴雨春飛風小痴大黠應物理孫痴非痴乃其聰痴  
翁之死誰繼出西川曹狂稱最工痴狂乃有兩絕執  
爚耀滇南與江東竭來曹狂數相見吮毫蠲紙驚飛  
蓬月坡仙人好奇者賞鑒自與山谷通鳳嬉亭前月  
瞳瞳更僕不知寒漏終銅盤燒蠟春如烘懸圖索賦  
何匆匆蚊脚細字盈方空酒酣操觚持似公雕刻自  
愧吾家雄

觀金潤甫畫壁歌



壽亭侯廟蒼山傍金生畫壁真擅場只今一百五十  
載火旗雲馬神揚揚古來好手吾能說開元之中三  
昧絕左衛將軍李思訓右丞才子王摩詰金生動筆  
師王李古法不墜今罕比有時放遣來滇水尋奇亦  
過蒼山址乘興歛然掃素壁蛟龍扑舞長風起千年  
戰功猶昨日颯爽英姿炯不死想見解衣槃礴時寂  
寞後代覓心知蛛絲蟲網日凋壞賞者何人護者誰  
翻嗟古來才士蕪沒亦何限感慨為爾擊節生遙悲

明新安吳勉學校梓

升菴先生文集三十九卷

升菴先生文集四十卷

從子有仁編輯

成都楊慎著

後學趙開美校正  
高安陳邦瞻重校  
江陽王藩臣  
內江蕭如松 全校

六言四句至八句

題周昉瓊枝夜醉圖

寶枕垂雲選夢玉簫品月偷聲步搖翻霜夜艾瓊枝

扶醉天明

魏帝臺隨風動滕王棟與雲飛人門遙望碧落仙界

高連紫微



金縫細裙一搦玉鈎羅襪雙彎瓊腴粉英朝翠錦緻  
松脂夜丹

永巷襲情捲玉長門絲淚銷金合歡蘸暈綠淺楊柳

麴塵黃深

襲情捲玉見劉子鮑照詩絲淚銷金骨

百子池頭麗人三花樹下長春襟解微聞香澤帷褰

想見橫陳

星點盈盈笑靨雲衣嫋嫋輕裕醉粧淡紫沙窳胡旋

墜金次工

次工胡女帽名

海上麻姑送酒雲間玉女投壺應喚南朝老庾水滸

冷面江圖

江圖庾果之所畫李賀詩江圖面水滸

秋夕

月暗螢頭點草露涼蚊喙開花病懷不寐達旦歸夢  
何由到家

題西湖十景鄒和峰家藏戴文進畫巨浸秋波

玄圃樓臺近水醉鄉日月宜秋萬里鳧舟鷁棹千重

貝闕龍湫

寄張愈光六言

四首

屈子無梅花句杜陵欠海棠詩華屋不成三瓦寶劍  
惟聞一吹

其二



斛律光勅勒詠劉越石扶風歌曲高從來和寡妙處  
正不在多

其三

赤壁磯頭孤鶴碧雲天外冥鴻酣酒無妨草聖禁詩  
且作花翁

其四

詩須有爲而作文至無心乃傳蘇武河梁四首劉伶  
酒頌一篇

江山平遠樓避暑六言

地靜一塵不起樓高四望皆通渴煮雙泓茗月飽聽

萬壑松風

永寧早發寄郭雲屏

後嶺雲開雪霽前途車堅馬強自是人憐衰朽敢云  
天佑忠良

周儀晚晴六言

剡溪無心泛雪衡山有意開雲天借黃綿襖子怜吾  
七十從軍

感懷六言

四首

玉皇香案仙吏金馬碧鷄老兵我自甘爲于役衆怪  
胡爲此行



又

楊子登科之歲周郎破敵之年屈指于今三倍不成  
一事華顛

又

黃昏忽見山店倦客歡情倍增茆柴清于桂醕松明  
紅似仙燈

又

征途九十方半記里二千有零夢攪離心夜夜愁添  
旅鬢星星

雪關見梅六言

自甘蠻方瘴癘誰憐姑射肌膚腸斷何郎東閣魂銷  
林叟西湖

敞唐六言

爐道穹隆龜背折坂詰屈羊腸惡溪四十八渡怪松  
百千萬行

霑益六言

古跡碧雞金馬畏途水菁雲關春迎滇陽勝境雪送  
貴竹殘山

林子瑞相迎至歸化寺丘鴻夫楊元達繼至六  
言



遙山明如罨畫玄冬暖劇青陽喜見滇雲舊侶重到  
并州故鄉

贈老門生八人

昔年羣賢沂水今日九老香山百歲重來會面一樽  
相對開顏

正月六日溫泉晚歸

月似銀船勸酒星如玉彈圍棋幾杵林鍾敲後兩行

松火歸時溫泉晚舟歸漏已下三鼓新月將沉望之  
比初出甚大形如銀船衆以為異予曰非

異也古之詩人亦未嘗玩新月至三更耳李文饒  
云日月終古常見而光景常新信夫昔人詠月金  
波自司馬相如始玉塔自東波始銀船自予始也

摩尼寒夜

毛孔渾成白醉鱗面忽變紅酣玄朔何愁滕六青陽

已到孫三孫康也

讀余懋昭遊青城山詩因寄并韓飛霞

白沙一百八渡青城三十六峰樽酒此時相憶烟霞

何日重逢

冷節

花嶼月籠釣碣柳店風搖酒旗四十五春寒節一百

六禁煙時

感通四首



飛瀑懸泉百丈禪枝意樹千年橋板遙通絕澗藤蘿  
上合諸天

其二

寶地三千色界蒼山十九雲峰樽酒此時相聚烟霞  
何日重逢

其三

璇響雲中孔雀鍾鳴霜裏華鯨龍樹七人共坐虎溪  
一笑相迎

其四

流水高山唱詠明月清風主賓塵土不驚幽夢乾坤

自有閒人

秋晚

婢喜蠅僵霧帳兒誇蝸篆風楹片雲片雨送暑殘日  
殘霞閃晴

雨中招楊伯清

禁酒停歌罷笑聽雨焚香煮茶欲借陶公木屑共散  
維摩天花

卜雲林篇

十二首

卜雲林篇爲吳郡王元肅雲林山居作也元  
肅不遠滇徼懷我好音乃取遠遊擬招隱綴



斯篇

卜雲林兮栖真結靈茅今遠濱迥與太初爲隣離世  
遺物絕塵魚鳥自來親人

射干獨立山椒長松落落英標覆露玄雲素朝結璘  
鬱儀相邀景界一何參寥  
長謠淒淒鏘鏘鸞雛鳳伯相將鴟雞羣晨成行西天  
老胡文康上雲樂奏併倡

吟篁嘯桐四清間宮變徵希聲井公下博明瓊玉女  
投壺電生炤景飲醴含情

折醒曉踏瑤茸琅玕琦玗交擁柯攢葉抱花捧重露  
成幃垂隴晞髮忘言息踵

處雄虹兮標顛玉樹青葱際天口誦石室苔篇坐飲  
金膏冷泉炯如龍漢初年

橫看晚靄嵐沉食沆漑淪陰微披蕙帶蘭襟追和  
遊山九吟聊以陶鑄塵心

采秋菊兮露沾黃菁玉豉金鹽充物丹房藥奩變化  
七鳥九蟾後天獨秀蒼黔

織落毛兮爲衣谿谷杳窅迂威駿狼薦暖長暉弄徹  
梅軫蘭徽看舞素雪朔霏

解澌圓折璿流回淵比心清眸遊鮀皎鏡中浮遐想



惠施莊周千載一朝同遊  
歎物論兮難齊甘滅景兮雲栖鷓鴣何心驪驥升高  
或斧之梯誰言亨衢可躋  
兩無悶兮潛龍歲寒後凋惟松雲林朝市雍容達人  
何心標踪逝將往兮君從

長干三臺 四首

鴈齒紅橋仙舫鴨頭綠水人家邀郎深夜沽酒約伴  
明朝浣紗桃葉波橫風急梅根渚遠烟斜

又

日出秦樓南畔春深宋玉東家簾細眼波易透窓疎

眉語難遮莫問河陽消息不是長安狹邪

又

絳樹纖腰鬪柳碧玉芳年破瓜波上襪羅回雪風前  
唾袖生花自有石城艇子不須油壁香車

又

二月稍頭荳蔻五更風外楊花殘香尚留翠被餘粉  
猶沾絳紗樓上曉鐘催起岸邊柔櫓咿啞

寒朝早起即事

籬頭篲栗競發鑪心楫柁通紅煨香蹲鴟已熟流澌  
凍醴方融小窻一梳新月影在梅花樹東



燉煌樂

角聲吹徹梅花胡雲遙接秦霞白鴈西風紫塞皂鵝  
落日黃沙漠使牧羊旌節闕氏上馬琵琶夢裡身回  
雲闕覺來淚滿天涯

禺山傳五嶽山人任少海書札兼致問訊因憶  
五嶽山人相憶八行書札遙通吹簫夜郎月下采藥  
白帝雲中塵世英雄易老浮生踪跡難同張衡四愁  
吟斷宋玉九辨悲窮

凝光門觀江漲

六月舊井无禽七月乘船入市樓臺蜃氣晨浮原隰

龍鱗秋洗望洋河伯自矜鬻渡津人爭喜東林老衲  
厭喧喚打暮鐘清耳

會津門觀江漲望小市人家戲作

渺渺波環紫貝蕭蕭風起青蘋花市寧非海市美人  
疑是鮫人眉嫵春山學翠臉凝秋水爲神銀漢雙星  
漫渡石城兩槩無津

卽席贈任棠山

紅濕城中仙里香霏閣下人家幸遇風流地主渾忘  
飄泊天涯六彩狂呼瓊略百杯爛醉金沙何日公尋  
黃石壁津共泛靈槎



七日遊雨湖

船尾輕陰細雨樓頭飛靄沉暉美景良辰有客賞心  
樂事無違與比王猷剡曲踪似嚴陵釣磯烟外青帘  
風舞得魚沽酒方歸

古意

生長芝蘭小名嫁得廬江仲卿羅帶同心羞結金釵  
兩股牽情行雨行雲窈窕非煙非霧輕盈愁見遠山  
凝黛催人咫尺離程

贈琴姬

美酒中山捲波佳人上宮陳娥商聲若出金石楚奏

渾非綺羅麗曲幽蘭白雪仙音月渚風柯金徽可以  
娛耳玉佩無勞當歌

寒夜卽事

墻頭凜冽霜白爐心榾柮春紅寒栗煨香已熟凍醪  
淡漾初融病起一陽來復吟成長夜方終耿耿青燈  
背壁影射梅花樹東

歸田四咏爲憲副卞蘇溪賦

卞名偉

五風十雨樂歲東臯西崦人家水心魚浮菖葉屋角  
鷓鳴杏花餉隴青梅煮酒訪隣綠筍烹茶問津寧知  
沮溺祠田但祝污邪

右春耕



長夏冷風清  
新晴丹鉛綠  
疇山高羊羣  
似蟻水潤  
牛背如舟半  
幅生烟霧  
三腔短笛悠悠  
柴扉歸來  
早掩斜陽影  
在簷頭

右夏牧

日出煙消露晞  
百丈清江釣磯  
船似天邊穩坐  
魚若空行無依  
襖靄歌星獨往  
娑娑舞月方歸  
兆熊不夢  
渭叟狎鷗久忘  
漢機

右秋漁

城闕軟紅塵  
遠林巒空翠  
嵐深丁丁鳥驚  
斧重霏霏  
雪壓担沉沙  
明東郭履跡  
谷響南華足  
音歸去自換  
村酒不須解  
却貂金

右冬樵

從軍行

鶉鷄十八從軍  
貔貅百萬趨羣  
千里獨行無敵  
一身是膽曾聞  
六出羞稱奇計  
五餌盡是虛文  
此際毛錐  
何用畢竟刀環  
勒勛

送客

合樽且醉花間  
分襟易慘離筵  
朝下東風紫陌  
天涯落日青山  
美人明月相望  
游子浮雲獨還  
愁見河橋  
柳色勞歌一曲  
陽關

盤江渡

莊躋牂柯楚地  
博望乘槎漢年  
一壑雲濤洛洞  
兩岸石磴勾連  
樹鋒夕聲靈籟  
草際朝嵐暮煙  
倦策蕭蕭



水升者集卷之四  
羸馬愁看站站飛鳶

明 新安吳勉學 校梓

升菴先生文集四十卷



